

# Jesus laaft iwwer's Wasser

Er hat gepredicht, widder mo,  
a Haufe Leit war'n domols do.  
Do saat er leis zu seine Jinger:  
„Ich regel do noch e paar Dinger.  
Inzwische künne er als steie,  
in's Boot, das duht am Ufer leie.

Rudern dann no Bethsaida,  
hallen druff, dann sinn er frih da!  
Fahr'n als voraus, ich kumm schunn no,  
bis an die Nacht bin ich dann do.“

Die Jinger stei'n ins Boot un's geht  
iwwer de See Genezareth.

Inzwische hat ehr Chef die Leit  
schunn hämgeschickt, weil es is Zeit,  
fer zu spreche e Gebet.  
Er merkt net, wie die Zeit vergeht.  
Un so isses ziemlich spät,  
die Sunn im See grad unnergeht,  
als er allä am Ufer steht.

Des Boot, es schaukelt auf un nieda,  
uff em Weg no Bethsaida,  
war mitte uff dem große See.  
Die Jinger duhn sich arisch weh,  
weil de Wind blost ne entgeh.

Sie rudern, hann ehr liewe Not:  
Kä Knote vorwärts macht ehr Boot.  
Sie sinn gestresst un voller Fruscht,  
Do vegeht em doch die Luscht!

De Petrus ruft: „'s is zum Verrecke!“  
Do bleibt em 's Wort im Hals drin stecke.  
Er guckt entgeischtert iwwer's Wasser,  
guckt noch emol un glaab schunn, dass er  
verrickt worr wär un spinne däht,  
weil do änner ungeniert  
vun de Welle unberiehart  
ganz äfach iwwer's Wasser geht.

„Ehr Männer“, ruft de Petrus dann,  
„gucke eich das do mol an!  
Do laaft e Geischt! Jetzt isses aus!  
Do kumme mer nimmi heil eraus!“

„Nor kä Angscht, ich bin’s doch nur,  
vun Gespenschter ga kä Spur.  
Seid getrost, lasst mich einsteige!“,  
so sprach er - un der Wind tat schweige.

Do sinn se platt, doch bleiwen heil.  
De Petrus saat: „Eh Alter, geil!“

## ... un es Lied deno

*Melodie: Deine Spuren im Sand*

Refrain:

Seine Spuren im Sand,  
die mer vorher noch fand,  
hat die Flut mitgenu-u-mm.  
Wo is er bloß, herrje?  
Als vom Strand er verschwand  
wie die Spure im Sand,  
is er do fortgeschwu-u-mm?  
Nä, er lief iwer’n See.

Strophe:

Iwwer’s Wasser zu laafe,  
ja das is ga net arisch leicht.  
Mit so Dinger aus Gummi  
un mit Luft drin do geht das vielleicht.  
Awwer bafuß mit nix unne dro,  
das kann niemand äfach so.  
Nor änner kriecht’s hie,  
das hann er ewe gesieh.

Seine Spuren im Sand, ...

